



CONVENIO PLURIANUAL DE COLABORACIÓN ENTRE A CONSELLERÍA DE CULTURA, LINGUA E XUVENTUDE E A UNIVERSIDADE DE SANTIAGO DE COMPOSTELA PARA DESENVOLVER NOS ANOS 2024, 2025 e 2026 UN PROGRAMA DE ACTUACIÓNS SOBRE O NEOFALANTISMO A TRAVÉS DO GRUPO DE NOVOS MEDIOS DA FACULTADE DE CIENCIAS DA COMUNICACIÓN

MEMORIA XUSTIFICATIVA

O secretario xeral da Lingua da Consellería de Cultura, Lingua e Xuventude **DECLARA:**

Que esta secretaría xeral ten previsto formalizar coa **Universidade de Santiago de Compostela (USC)** o instrumento convencional arriba referido por unha vixencia que vai dende a data da súa sinatura ata o 30/11/2026.

Que o instrumento convencional ten por obxecto:

Establecer as condicións polas que se rexerá a colaboración entre a Consellería de Cultura, Lingua e Xuventude, a través da Secretaría Xeral da Lingua (SXL), e a USC para desenvolver nos anos 2024, 2025 e 2026 diversas actuacións ou proxectos sobre o neofalantismo a través do Grupo de Novos Medios da Facultade de Ciencias da Comunicación.

Que existe converxencia de intereses entre as partes para a consecución do obxecto referido.

Que o instrumento convencional se fundamenta no seguinte:

As partes pretenden colaborar conxuntamente para fomentar e promover o uso da lingua galega, de acordo cos artigos 5.3 do Estatuto de autonomía e 6.3 da Lei 3/1983, do 15 de xuño, de normalización lingüística.

O artigo 7 do Decreto 146/2024, do 20 de maio, polo que se establece a estrutura orgánica da Consellería de Cultura, Lingua e Xuventude, atribúelle á SXL, entre outras, as funcións de promover, coordinar e desenvolver a política de investigación que favoreza a normalización lingüística nas súas diferentes manifestacións, así como promover o diálogo, a cooperación e a colaboración con outras institucións competentes en materia de política lingüística. Así mesmo, correspóndelle programar e desenvolver medidas para o fomento do uso do idioma galego nos diferentes eidos sociais e económicos de Galicia, co fin de incrementar a dispoñibilidade de produtos e servizos en galego, e planificar e desenvolver campañas e medidas de fomento do uso, coñecemento e difusión do galego dentro e fóra do territorio lingüístico galego. Ademais, baixo a súa dirección, realízase a coordinación e xestión das actividades de formación e promoción da lingua galega, así como a produción e oferta de recursos tecnolóxicos para fomentar o seu uso, a xestión da produción de material para apoiar a formación en lingua galega e a organización de cursos, seminarios e xornadas formativas.





A Consellería e mais a USC contan cunha longa traxectoria de colaboración que pretenden seguir mantendo para levar a cabo os diversos proxectos de investigación que se están a realizar no ámbito universitario. Neste marco, sitúase a colaboración co Grupo Novos Medios da Facultade de Ciencias da Comunicación da USC, que se iniciou en 2021 co fin de contribuír á formación e ao fomento da lingua galega a través dun programa de actuacións sobre o fenómeno do neofalantismo, e que agora pretende continuar grazas a este novo convenio.

O Grupo de Novos Medios é un referente social de recoñecido prestixio e un dos principais axentes xeradores de coñecemento en Galicia. Particularmente, destaca a súa contribución ao desenvolvemento da investigación científica e tecnolóxica en proxectos de comunicación. Dende o 1999, a súa liña central de investigación foi e segue a ser o impacto e a relación das tecnoloxías cos cambios no ámbito da comunicación, lingua e información –tanto na produción coma na difusión e recepción– e na divulgación do coñecemento.

As partes son conscientes de que deben colaborar en prol do proceso normalizador e do cumprimento dos obxectivos da Lei de normalización lingüística e do Plan xeral de normalización da lingua galega que se aprobou en 2004 co fin de divulgar e estender o uso do galego a todos os ámbitos da sociedade. De igual modo, colaborarán no Plan de dinamización da lingua galega na mocidade, co que se pretende mostrarlle á xente nova a utilidade de coñecer o galego e potenciar así o seu uso neste colectivo, o que inclúe medidas conducentes a incrementar a súa presenza nos espazos nos que se move a mocidade, así como a oferta de actividades e produtos en galego en áreas como a tecnoloxía, o lecer, a cultura, o ensino ou o emprego.

Que os intereses converxentes das partes exclúen o ánimo de lucro e non poden satisfacerse axeitadamente mediante un contrato dos contemplados na Lei 9/2017, do 8 de novembro, de contratos do sector público ou outro instrumento alleo á natureza estritamente convencional.

De acordo co exposto, e co fin de dar cumprimento ao preceptuado no artigo 15.2. da Lei 1/2016, do 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase dixitalmente esta memoria en Santiago de Compostela.

O secretario xeral da Lingua

Valentín García Gómez

